

قلبي الخجول

شعر
شريف أنيس



قلبي الخجول

أشعار بالعامية المصرية

شعر

شريف أنيس

قلبي الخجول

شريف أنيس

تصميم الغلاف للفنان / أحمد فريد

دار

البديع العربي

للطباعة والنشر

ت / 01061635162

رقم الإيداع: 2022-3118

الترقيم الدولي: 9-0843-94-977-978

إن الآراء الواردة في هذا المصنف لا تعبر بالضرورة عن آراء
وتوجهات الناشر وإنما تعبر عن رأي المؤلف فقط

يمنع نشر أو نسخ أو ترجمة هذا المصنف أو جزء منه بأي وسيلة
تصويرية أو إلكترونية أو ميكانيكية بما فيها التسجيل
الفوتوغرافي والتسجيل على أشرطة أو أقراص مضغوطة أو أي
وسيلة نشر أخرى بما فيها المعلومات واسترجاعها بدون إذن
كتابي من المؤلف طبقاً لقانون حماية الملكية الفكرية رقم ٨٢
لسنة ٢٠٠٣ والقوانين المماثلة لها

الإهداء

الى

من سكنت الروح ولم تغب

والى

من أبهجت القلب بحب عجيب

زوجتي

والى

روحا وجمالا وقلبا رحبا أخی الأكبر

أهديهم جميعا ديواني الأول

الشاعر
شريف أنيس

كحل عينيك بالصبر

كحل عينيك بالصبر
خلي الرضا صاحب
إرسم وشوش بالحبر
ع الصفحة واتصاحب
واكتب ف نص السطر
كان ليا ميت صاحب
مفاتوش ف آخر العمر
غير الوجع صاحب
طعم الحقيقه مر
لكن ملهش هروب
ياما حمول تتجر
أثقل من المكتوب
وياما خلق تضر

ولابسه توب محبوب
والقلب يفضل حر
لو حتى بات مغلوب
أنا قلبي عاشر ناس
وتاه مابين مخاليق
بيزوقوا الاحساس
ويزيدوا ف التزويق
وقت الحقيقه إنداس
وشاف قلوب بتضيق
شرب مرار الكاس
وحيد ف وسط طريق
يا صاحبي يا موهوم
متغطي بالأحلام
قوم من سباتك قوم

الحلم آخره كلام
يخطف عيونك يوم
وتطير بوهمه حمام
ولا حلم صيف بيدوم
ولا العيون بتنام

خيال...

يا اللي بنيت الحلم خيال
ساند ضهرك حبة طوب
طالع م الأيام متشال
منتاش غالب أو مغلوب
تفرد كفك تشكي الحال
متعلق بحنين معيوب
أخر صبرك طيف ومحال
مين قال لك إنك موهوب
الدنيا تغرك بغاوي
تفرش قلبك للأحباب
وتصدق م الكذب حكاوي
وتسافر بخيال كداب
تحلف إنك حلم وغاوي

تتفسر على أرض سراب
وعيونك بالدمع تداوي
قلب حزين لساه متساب
سطرك يلمع قدام عينك
والحبر يسافر لبحور
توصل تنهيدك بحنينك
وتلون بحروفك نور
تفرح حبه وترضي سنينك
تكتب لكن مش مسرور
فرحه تبان ف عيون عاشقينك
بس ف قلبك عتمه وسور
منتاش شاعر إلا بروحك
لما بتفرح فرحك زور
وأما تخبي العتمه جروحك
يتقال عنك طيف مغرور

قلبي الخجول

كل قصيده بترسم صوره
واللون تايه ف البرواز
والأيام ف عينيك مكسوره
متخبیه ف حلم قزاز
فوق من وهمك منتاش شاعر
وحروفك أخرتها أنين
مهما كلامك يحكي مشاعر
صوتك برضه هيبقى حزين

عمار

إتكسر الضهر
ولسه القلب عشر تدوار
غفلنا العمر
ولسه الروح جواها عمار
نحلم بالستر
ونأخذ م الأيام أعمار
وما زال الصبر
مونسنا وقلوبنا نهار
علمنا الجرح
نقوم أول ما الصبح يلوح
نحضن ف الفرح
ونتلقاه بحلاوة روح

وإن غاب الصبح
بنستناه لو فين هيروح
ويطول الشرح
الحلم حياه واليأس جروح

كل القصص ...

كل القصص نهايتها معروفه
الا حكايتك يابن آدم غير
روحك تلف الدنيا مخطوفه
وتتوه ما بين الشر ولا الخير
انت الغريب ولا الغريب طبعك
تفرح بضحكه وتبكي م الأيام
شمسك تغيب والضل بيتابعك
وساعات تلوم نفسك ولا تتلام
روحك بتتعلق بكام مكتوب
وصوره باهته معانده ف الألوان
الخوف معلق فيك ومش بتتوب
ولسه فيك العند يا إنسان

تترين الدنيا قصادك حلم
وبرضه بتصدق وطاير طير
يكسر ف روحك ألف غدر وظلم
مين اللي أصدق انت ولا الغير
تكتب حروفك والسطور حكايات
والروح نساييم ترسم البدايات
ولسه خوفك باقي ف النهايات
أه يا ابن آدم ليه حنينك مات
تكبر سنينك والوجع ببيان
ويزيد حنينك تاني للي كان
والعمر شجرة خير ورقها حنان
لما بتكبر غصنها يتهان
تلف من حوالبك تلاقي وشوش

نفس الملامح بس روحها تغيب
اتغيرت بعديك ميتحسوش
والعمر سارح بيك ملهش حبيب
فوق يابن آدم دا الخيال كداب
هيعدي مليون حول وراح تتساب
تتجمل الدنيا بمال وسراب
وأخرتها مش هتنول إلا تراب

سنه ورا سنه ..

سنه ورا سنه والقلب سعيد
لسه بيتعلق بالعيد
يفتح بابه لحلم بعيد
ومازال متشوق وعنيد
الأيام شبه الأيام
والروح طايره وشايله سلام
لسه ف قلبي حنين وكلام
وبلون بالشوق مواعيد
تعلی الموجه ف بحر الخوف
والقلب يسافر مخطوف
تاخده مواني يلف يطوف
وبيرجع من تاني وحيد

سنه ورا سنه نفس الحكايات
مليون رحله آخرها سكات
وبنوصل نفس النهايات
والقلب المسكين بيعيد
يرمي حنينه على المقادير
ويصبر روحه بمشاوير
يفرح حبه وحبه يطير
بجناح عايش ع المواعيد
قلب عجيب موعود بخيال
حاضن جوه وريده سؤال
سنه ورا سنه فانت ومازال
عشقه غناوي وصبره نشيد
سنه ورا سنه والقلب سعيد

أمي ...

تنهيدة أمي الشقيانه
المرسومه أنين
بتصبر أيام دبلانه
بوشوش وحنين
وتفكر روجي الغفلانه
بريحة الغالين
إزاي بنعيش وسط شقانا
ونموت راضين

أربعين...

يخلق من الشبه أربعين
وساعات بيخلق اربعة
جوه الحيطان ساكن حنين
بس الصور متوجعه
نفس الشبه نفس العينين
تضحك وهيه مدمعه
الذكرى على رغم السنين
تنطق وتحكي المجدعه
كنا عصابه من القروء
والعمر كان ورقة شجر
نفس الملامح والبرود

حتى الشقاوه والضجر
وكان صندوق الوجود
إتلم ف شوية صور
أه ع السنين لما تعود
وتنطق القلب الحجر
يخلق من الشبه أربعين
وساعات بيخلق روح قمر

يارب ...

يارب عام من غير وجع
وأيام دفا من غير هموم
بزياده قلبي اللي إتوجع
بعد الفراق في كل يوم
يارب عام مليون أمل
مرسوم على وش البشر
يفتح ببيان حلم وعمل
تخضر أوراق الشجر
يارب عام توبه وصلاح
وقلوب تصالح بعضها
وعيون يغطيها السماح
ونفوس تعود من غيها
يارب عام فرح وسلام

وأرض ترتاح م الضجر
وقلوب تعود زي الحمام
ترحم متبقاش من حجر
يارب عام بركه وأمان
وخير يكفي كل روح
وحب يسكن ف المكان
وسلام ينسينا الجروح
يارب عام مجد وعمار
يملا القلوب قبل البيوت
ونور يغطي كل دار
والشكر يسكن كل صوت

عزيزي ...

عزيزي المذاكر
يا عقل الخشب
يا حافظ وفاكر
عصير الكتب
يا صوت بغبغان
والقفص من ذهب
بتعزف كمان
ولا طبل وقرب
يا عامل عمالك
بدون أي صوت
بتوصف جمالك
بلحن السكوت
حنينك وشايلك

لحد البيوت
ولا العز طايئك
ولا طولت موت
ياحافظ غناوي
وكذب البشر
بتحكي الحكاوي
وترسم شجر
تعد الخطاوي
لحد القمر
ولساك مداوي
الوجع بالسهر
عزيزي المثقف
رفيع المقام
هتكتب وتهتف

وتبعت سلام
وأخر ماتوصف
عيونك حمام
هتسكت وتخلف
وعودك تمام
قلم مش بيكتب
ورق مش حنون
وسطرك بيندب
ملامه وجنون
هتفرح وتكذب
بمكر العيون
وأخر ما تكتب
حروفك تهون
قصايدك حكاية

تخيل ع العيال
تزوق بدايه
تلون خيال
وأخر روايه
بترمي السؤال
جوابك نهايه
وفرحك محال
عزيزي اللي غنى
لورد الجنائين
يا مولد وحنه
وعمر ومدارين
تسافر لجنه
وترسم دواير
تفرح عيوننا

وخيالنا اللي حاير
عيونك مدينه
وقلبك نجوم
سطورك حزينه
وصابها الهموم
تسافر لمينا
وترجع تلوم
ولسه السفينه
معرفةش تعوم
عزيزي اللي خبي
ف قلبه الحنين
وشاف دنيا شابيه
برغم السنين
بكل المحبه

بتكتب لمين ..؟

معدناش أحبه

ولا طيبين

آخر السنه

إلحق عروض آخر السنه
قرب يا عم قرب يا بيه
تاكل وتشرب بالهنا
من غير ماتسال كيف وليه
بنبيع جميع المنتجات
وجع وفرحه وأمنيات
ونخبي ف الوهم حكايات
ونزوق الحواديت حاجات
أول عروض اليوم ضمير
مكسور ومتهان م الزمن
باعه زمان راجل فقير
بس الغرابه بدون تمن

شغال حجاره وكهربا
وتدوس عليه وقت اللزوم
ويفيد ف أوقات الغبا
وينام ويصحى كل يوم
ومعانا حبة ذكريات
تتباع كده على بعضها
صور وناس وعمر فات
راحت ونسيت بعضها
تنفع لتنضيف القزاز
أو تتفرش فوق الحصير
شايله ملامح ناس عزاز
والسعر هين مش كثير
ومعانا عمر ف علبه شيك
ضاع ف الهوا وسط النجوم

إتدفي بالحلم الوشيك
وتاه غريب وسط الغيوم
ينفع مخده ومرتبه
أو حتي شيالة هدوم
وعليه هديه مكتبه
وحنين وشعر ملوش لزوم
ومعانا قلب بميت وريد
مهموم بناس من غير سبب
يفرح ساعات ويبان سعيد
ولا عمره شال حبة غضب
نازل معاه حبة حنين
والعرض شامل توب وجع
إلحق وشيل ولو توبين
وإنت اللي كسبان يا جدع

إلحق عروضنا بلاش كسل
شخن جيوبك يلاهات
وهم وخیال مرشوش عسل
والصدق نازل تصفيات
جرب نصيبك بالعجل
بضاعه بارت سوقها مات
موسم لمن يغوى الأمل
والغاوي بينقط سكات

مضطر ...

مضطر يا صحبي
تحايل يومك وتسقف
ترسم على كفك
ألف جناح عثمان بيطير
مفطوم ع اللحم
وصوتك بالضحكه بيهتف
وأنا كل مشوفك
تحت رحاية الدنيا بغير
بتعاند روحك ولا حنينك
طبع قديم
إزاي بتلون وشك خير
رغم التنهيد

وإزاي مكسور الظهر وقلبك

لسه سليم

عيل طائر على أرض

بتتروق تجاعيد

الليل بيلومك علشان شمسك

مش بتغيب

والنجم بيلمع ف عيونك

والدمع قريب

والصبح مسافر بخيالك

وكأنه غريب

والروح لساها بتتعشم

لكن بتخيب

مضطر يا صحتي تلملم

حواديتك ف جراب

وتدور من صفحه لصفحه
والعمر كتاب
مش عاوز غير طعم الفرحة
لو حتى سراب
يا غريب متعود ع الغربه
بين الأحباب

رد الجميل

رد الجميل يا قلبي للأزمه
وأشكر حيطان الستر لو باشت
كل الوشوش تلمع بدون لازمه
نجوم خيال بتموت ولو عاشت
وقت الجماليل يرقصوا حواليك
غنة تعالب لحنها كداب
تيجي الهوايل ويسيبوك وحدك
والمكر غالب والوجع متساب
صبر عيونك بالحنين وحدك
واكتب بروحك كلمتين ع السطر
مفيش عيون غيرك تزور وعدك
ولا قلب تاني يعدي بيك العمر
طبطب علي نفسك بصوت مكتوم

وارفع جناحك فوق لألف براح
إنت اللي تقدر تنكسر وتقوم
وإنت اللي تصنع م الوجع أفراح
رد الجميل للحزن لو جالك
الصدق واضح بس وقت النوح
وإياك تصدق لحن زيف طالك
أو فرحه مش بتحس بالمجروح
ظمن عيونك لو غلبها الخوف
وإفرش سنين العمر توب يحميك
الناس ف وقت الجرح مش بتشوف
غير بس صوت الدمع جوه عينيك
رد الجميل يا صحبي للأزمه
وأشكر حيطان الستر لو باشت
كل الوشوش تلمع بدون لازمه
نجوم خيال بتغيب ولو عاشت

إندهاشك ...!

إندهاشك مش كفايه
والتعاطف شئ ممل
إنت جزء من الحكايه
ولا هتقضيها غل
لم باقي الهم وإرحل
كمل الليله بجمائل
وإن قالولك بكره أجمل
هيه هيه البخت مايل
الوجع متخبي صوته
والسعاده توبها واسع
والحنين ساكن تابوته
ليه تصحيه ع المواجه

لسه بتدندن يا خايب
لسه مستني الاجابه
دا انت من وسط النوايب
لحم طايب بين ديايه

وجايز ...

وجايز يما نتقابل
ويجمعنا زمن تاني
ولو ف الحلم أنا قابل
أشوف صورتك وتملاني
وجايز تنطق الأيام
بصوتك وأسمع التنهيد
أنا المسكون أنا المتلام
أنا المكسور بقلب وحيد
تغيب يما الوشوش عني
ووشك ليه بيغني
ويبعت حلم يسكنني
يطمني يقوالي سلام
وجايز يما نتقابل

العالم له قوانينه

العالم له قوانينه
يا غريب الروح يا مثالي
والكذب الناس عايشينه
ويشاوروا عليك دا خيالي
مطلوب متكونش بريء
مطلوب متكونش بسيط
وإن شوفت بقلبك شيء
تعمل مجنون وعبيط
وضميرك خد له أجازة
وإتداري ف أقرب حيظ
وأنصب للصدق جنازة
زوق بالزيف شخابيط

إضحك وقت المواجه
وصفار الضحكه بيان
وإعرض قلبك للبيع
إنت ف زمن البهتان
مطلوب متكونش مسامح
وتقول للظلم كمان
وصوابك تبقى جوارح
تكسر ظهر الغلبان
ترسم بدموعك صوره
وتخيل ع الناس وتفوت
وتدوس ف قلوب مكسوره
ولا ترحم روح بتموت
مطلوب متكونش ضعيف
الضعف ملهش لزوم

الناس ف ساعات الزيف
بتلوم حتى المهزوم
إتلون مليون لون
إعمل بلياتشو ومثل
صدقني ضمير الكون
طول عمره ياصحبي مكسل
العالم طبعه مزوق
ألوانه مهيش بصحيح
يفرح بالكذب ويبرق
والصدق طريد ف الريح
أنا زيك كنت بعافر
ومفكر نفسي أمير
طاير بجناح ومسافر
والحلم جناح بيطير

صدقت الحلم وخذني
لنجوم الليل فرحان
والعالم ياما وعدني
بحنين ووشوش ومكان
طلعت كوابيس مرسومه
بتميل على ظهر حنين
تتمسى تبات مهزومه
وأخرها يا صاحبي أنين
العالم له حساباته
العالم له قوانين

قلبي الخجول ...

قلبي الخجول
شاي ف عيونك بحر
ومخبي جوه
وريده أحلامه
يحلم يقول
والصوت بينطق سحر
رحلة حنين
مرسومه قدامه
يام العيون
الفرحانيين مشتاق
ترسم كفوفي طلتك بالنور
تحكي السنين
عن ضحكتين وفراق

وقلب متزوق
كما البنور
أنا اللي بكتب
ع الجمال مواويل
وأرسم بريشة قلبي
لحن وأدوب
قصاد عيونك روي
طيف بيميل
وإزاي يخبي القلب
ولا يتوب
أه من جمال متداري
ف التنهيد
يفرح ساعات وساعات
بيتمايل
يا لحن طاير من وريد
لوريد
هقول عشقتك
بس مش قايل

مثل....

مثل قالوه قبلنا
وكل يوم ببيان
كثر الفلوس مش غنى
والمال ملهش أمان
تتغطى بيه ميت سنه
ولو يضيع تتهان
يا صاحبي أخرك هنا
تحت التراب ندمان
إملا خزائنيك عشم
وإرضي بنصيب مقسوم
ربك بيوهب نعم
وبينصف المظلوم

تحتار ف لأه ونعم
وتتوه ف بحر اللوم
وتعيش أسير الندم
ولا يهدا بالك يوم
جرب تكون كالشجر
أخضر فروعك خير
تفرح ف وش القمر
وتطير بقلبك طير
ترسم خيال ع الحجر
وتعيش أمل للغير
تحلم كباقي البشر
يفضل حنينك غير

مولود ف الشارع

مولود ف الشارع وبتسكن
ف وشوش الناس
ياروح بتنازع إيه ممكن
يلغي الاحساس
بتدور علي نفسك يمكن
تفرح وخلص
وبتفرح نفسك بالممكن
وتشوفه خلاص
تجعيدة وشك مش شبيهه
دي حلاوة روح
تنهيدة قلبك مش عيبه
منتاش مجروح

متعلق والدنيا عجيبه
وحبالها جروح
ومسافر على أرض غريبه
يا غريب بتنوح
مليون تفصيله ف حكاياتك
والضحك وحيد
بيموت غرقان زي حالاتك
والبحر عنيد
تحلم وتعووم والموج فاتك
والشط بعيد
والصرخه بتعند ف سكاتك
بتعيد وتزيد

كان نفسي ...

كان نفسي توصل مركبي

قبل الميعاد

والموج تصاحب خطوتي

لبر الأمان

كان ودي أحايل الريح

ومتسوقش العناد

والشط يحضن سكتي

صوره ومكان

كان نفسي أكون وسط الحبايب

مش غريب

وجناحي زي الطير يرفرف

زي طيف

أفرح مع الحلم اللي غايب
والقريب
وأخطف ربيع الدنيا من قبل
الخريف

الليل غريب ...

الليل غريب بيوشوش النايمين
الصوت قريب لكنه لسه حزين
والناس تحن ولسه فيها حنين
وساعات يضن القلب مش بيئين
بعض البشر بيحنوا للألوان
والليل صور بتفكر الغفان
والناس شجر تخضر يوم وتبان
وساعات قمر يلمع لكن دبلان
والفجر بعد الليل ملهش حبيب
يلمح نجوم بتميل لكن بتغيب
يتمسى ع المواويل ودمعه قريب
وساعات يلوم الليل لأنه غريب

حُضن شعاع الشمس باب مكسور
شق الحنين والهمس قلب السور
خطف الزمان م الأمس حبة نور
وساعات براح يتحس لكن زور

بين المداين

بين المداين شوفت ألف مدينه
بتلف توب الفرع ع الصفين
إلا مدينة قلبي لسه حزينه
مكتوب تبات والدمع ملو العين
على بابها صورة حلم مش مسموح
وبين شوارعها الوشوش بتغيب
يحكي الوريد عن شمسها ويبوح
وإزاي بترحل سايبه ألف حبيب
نفس المدينه باختلاف العمر
بس المدن زي البشر بتزول
أوقات بيسكن بين دروبها فجر
وساعات بتبكي بس مش بتقول

أه يا مدينة قلبي مين قساكي؟
مين علمك كتم الحنين ف الجوف؟
هوه الوجد مكتوب يعيش جواكي
ولا البعاد والغربه فاتوا الخوف

خلي سرڪ .. جوه بير

يا اللي فرحان بالقصايد
والحيطان حاضنه الشهايد
بص شوف خيبتك وشاهد
المشاهد مش بخير
خلي سرڪ... جوه بير
كنت فاكرا الشعر واحه
والحنين واخذ مساحه
مش هتلقى يا صحبي راحه
والصراحه آخرها غير
خلي سرڪ....جوه بير
جنة الشعرا ف خيالك
والوجع فوق إحتمالك

أوعى تغرق ف إحتفالك
فيه بدالك ألف طير
خلي سرك... جوه بير
وزعوا التركة القديمه
شغل حلق حوش وسيما
والبدل بالغش قيمه
والهزيمة ف الضمير
خلي سرك... جوه بير
يا اللي بايعين القضيه
إحنا شعرا مش هفيه
أو حمام محبوس ف غيه
لما تنووا نطير نطير
خلي سرك ... جوه بير
إبتسامه الزيف علامه

والوشوش ناقصه الشهامه
إتزرع فيها الغشامه
والملامه ع الفقير
خلي سرك ... جوه بير
الورق كوتشينه طايب
والحبايب مش حبايب
يضحكوا والصدق غايب
واللي خايب ليه يغير
خلي سرك....جوه بير
حقله عندك ندوه عندي
خد ف جيبك شيل وعدي
العنب كاليوستفندي
كل وهدى الخير كتير
خلي سرك جوه بير

يا اللي فرحان بالكتابه
يخطفك لحن الخيايه
صوت وجع ملهوش إجابيه
هيه غابه ناقصها خير
خلي سرك جوه بير
قول لروح الشعر موتي
والحروف ترسم تابوتي
وإنتصاري أو سكوتي
يفرق إيه من غير ضمير
خلي سرك جوه بير

قلب صغير ...

فيه حد شاف قلب صغير

بوريد حيران

عشمان ف حلم وبيدور

على ناس ومكان

تلمع كفوفه ويتصبر

رغم الأحزان

ويغطي خوفه بروح تقدر

ومازال عشمان

يا أهل الودع بين الضلوع

كان ساكن قلب

رغم الوجع يضحك موجوع

ومازال بيحب

طيب جدع تنهيده دموع
كالريح بتهب
رافض يقع كالطير مرفوع
علشان بيحب

الحلم درويش

الحلم درويش
عين ف جنه وعين ف نار
كيفه السهر للفجر
على صوت النجوم
الصبح يلبس توب شيطان
وأخر النهار
يسكن ضريح الاوليا
وقت النزوم
والبخت مارد وإتحبس
جوه الفانوس
وصاحبه كهل بمخ عيل
بيداديه

وتفيد بإيه الطبطبه
وقت العبوس
وإزاي يطير مارذ ضرير
راحت عليه
والروح مرأيه ملونه
تعكس خيال
وصوتها مصبوغ بالوجع
والأه . دليل
تفرح مخييه الضنا
وقت السؤال
وساعات تتوه لو تتوجع
والدنيا ليل
والفرح شابه معطره
والدنيا صيف

والشعر متلون ذهب
لكن حزين
بعيون بريئه مكسره
خدها الخريف
بيشوفها موج البحر
يتزوق حنين
والشعر حلم بيترسم
والسطر روح
والحرف عمر بيتقسم
يحكي الجروح
والناس ملامح تبتم
وساعات تنوح
والعمر رحله بتتقسم
وأخرها نوح

كان....

كان آخر نسخه ومطبوعه
ف كتاب متهان
بيلون روحه الموجه
من غير ألوان
وسطوره بتنطق تتوجع
والصوت مكتوم
والمركب تاهت لا بترجع
ولا يعرف عوم
مش عارف هوه اللي حدفني
من غير عنوان
ولا صوت تنهيده اللي خطفني
وقلبي الغلطان

كل اللي ف بالي كلام قاله
ووشوش ومكان
وحنين يوصفلي ف أحواله
والذكرى أمان

فات من عمري سنه

فات من عمري سنه
لكن غير السنين
مرايتى تقول أنا
والقلب يقول دا مين
ملامي هيه هيه
لكن ف عيوني شئ
بيقول إنت القضية
والظالم والبرئ
إحترت مابين ملامي
ومابين قلبي الحزين
إزاي كام ضحكه تمحي
عمري المرسوم أنين

يا صوره بتحكي سني
وعيونى المحترين
أوقات بضحك لأنى
عمري مش بالسنين
وساعات الحزن يلمع
يفضل منى الحنين
ومرايتى تغيب وترجع
تسألنى إنت مين

نكبر ...

نكبر وفاكرين
الزمن تمثال
تسكن وشوشنا
كلمتين وسؤال
إحنا الحنين
ولا الحنين متشال
متصبرين بالوهم
ولا المال
العمر طير
وبراحه ملهوش حد
نحلم نظير
لو حلمنا ع القد
والخوف مصير
لما السنين تتعد
والروح أسير
والحلم سور يتمد

سلام ...

يا حلم متزوق وجع
مرسوم على كتفك جراح
بتميل عليك الريح تقع
ولسه قلبك فيه سماح
يا طير وغاوي الشقشقه
وروح بتتهجى الصباح
متعبش قلبك م الشقا
ولا توبت من كتر الصياح
يا ضهر كل الفرحانيين
يا قلب كل المكسورين
يا ضحكه بترفرف أنين
مكسور ولسه فيك براح

يا لحن على غنوة أمل
يا فرح متداري ف خجل
يا صوت حنين ملهوش أجل
طير وله مليون جناح
لساك واخذني ف سكتك
بيشدني صوت غنوتك
تضحك ألون ضحكك
ويبان ف تنهيدك مزاح
منتاش بعيد يا صحبي أه
رغم انشغالات الحياه
لا صوت غناك
ف الزحمة تاه
ولا حزن قلبك عني راح

يا ضل بـيرفر ف أمان
يا معنى وحكاية ومكان
يا قلب متعود يبان
رغم الوجد لساك صلاح

ورده

أوقات بتكبر ورده
ف الأرض الغلط
يكثر عليها الشوك
ويكتم حسها
تخاف تغنى معانده
وسط قلوب زلط
ويموت غناها بين
دموعها وهمها
وساعات براح الكون
يقدم طوق نجا
يفتح ببيان الحلم
للقلب بخجل

تهرب عيدان الورد
ف الدنيا الفضا
وتلاقي مليون حزن
مفروش بالأمل
وبين قساوة الشوك
على الورد الحزين
وصرخة المشتاق
ف ليل الانتظار
تفضل حكاوى العشق
ف الغيب مكتوبين
والروح تسافر بالوجع
طول النهار

شجن

كفرح المسافر
بيوم الوصول
كقلب المعافر
ف وقت الحمول
كعشق السنابل
لريحة المطر
كعمري اللي شايل
ف كفه القمر
بحبك وشايف
ف روحك شجن
تخبي الشفايف
يبوح الزمن

أسافر بحزني
وعمري التمن
وصوتك ياخذني
لضله ووطن

حكواتي

حكواتي شمسافر لبعيد
بيبيع للخلق الأحلام
يسكن حواديته التنهيد
وساعات تغلبها الأيام
يفتح لك صندوق الدنيا
والكف مرايه تشوف فيها
أيام موعوده وناس تانيه
ونجوم بتسابق بعضها
حكواتي وبيخبي الضحكه
وف صوته ملامح مرسومه
بياخذنا كلامه لميت سكه
نسر ح ف عيونه المهمومه

مجنون بالدنيا ومش تايب
وما زال بيوزع حكاياته
ولا واخدم الدنيا نوايب
غير حلم مونس أوقاته

تغور السياسة

تغور السياسة
وشغل الورق
ووهم الفراسه
الحزين لو برق
نصدق ف ساسه
ضميرهم هفق
يبيعوا النحاسه
ف أقرب نفق
تاخذنا الحماسه
خيول ف السبق
وألف افتكاسه
وعومه وغرق
تضيع الكياسه

ف عمر إتسرق

نلم الكناسه

وبواقي الورق

ونرضع تعاسه

وهم وعرق

وأخرنا انتكاسه.

وقعر الطبق

ولا نطول سياسه

ولا نطول نبق

تغور السياسه

وشغل الورق

طابور المواجه

بيصرخ كفي

بميت حلم راجع

مشفش الدفا
وماليه المسامع
غناوي الوفا
وجرح المدامع
مالاقي الشفا
كلام ع الغلابه
مغطي الشاشات
بيرسوم سحابه
بكل اللغات
وكذب وخطابه
مع الأغنيات
لا غابت كآبه
ولا فرحه جات
تغور السياسه
وشغل الورق

تغور التجاره
بحلم الفقير
قلوب من حجاره
مخاصمه الضمير
تموت العباره
ف سطر المصير
وتنزل ستاره
ف مشهد اخير
سياسه و غناوي
وناس مكسورين
وعمر و حكاوي
ومولد حزين
ولسه اللي غاوي
ينقط حنين
ويشرب قهاوي
على الميتين

نور

بلورة الحلم المسحوره
بتطلع نور
ترسم حواديت على كام صوره
وشراع وبحور
وعيوننا بتسرح مبهوره
ونلف ندور
وخيالنا يسافر ف الصوره
من غير باسبور
شكرا لعيون عرفت تحلم
من غير ماتخاف
سهرت على لحن خيال ترسم
والحلم إتشاف
واللون غير شكل الدنيا
ف عيوننا وطاف
والكون إتحول لحكايه
وخيال شفاف

إنتي ...

إنتي القصايد
والكلام والسطر
إنتي الحكايه
والدفا والبحر
وإنتي الحنين
لما الحنين كان شعر
وإنتي البدايه
وإنتي كل العمر
طيفك يزوق
كلمتي بحروف
والحرف شايل
غنوتك مواويل
إنتي الأمان
لما ياخذني الخوف
وإنتي الأمل
لما السنين بتميل

وتقريبا

وتقريبا معدش باقيلي
غير شجره
وركن ف أوضه مهزومه
بتستني بواقي العيد
وعيل طيفه جوايا
بي رسم صوره للقمره
يكلما على إستحياء
وتتهد وصوتها بعيد
ومستنيها تحدفله
أمل متداري ف التنهيد
وتقريبا معدش غيري
ف الشارع أنا الموهوم

أصفر للعيال لما
يغيب الحلم وقت النوم
ونجري نخطف الأيام
ونتخبى ف لبس جديد
وتقريبا أنا وحدي
اللي مستني
عيون الشمس لما تقوم
ولسه عيوني خجلانه
بحزن بس مش بتلوم
ولسه الشمس تقلانه
بترمي جوه مني هموم
وتقريبا أنا وحدي بنادي العيد
وصوتي بالصدى مهزوم

مطر ...

مطرف الميدان
وإبتسامه وخجل
وخوف ع البيبان
بس حاضن أمل
وريحة زمان
لما تحكي عجب
ياخدنا المكان
والحنين من دهب
مطرف الشوارع
مغطي الوشوش
يدفي اللي راجع
بكفه البشوش
تغيب المواجه

وترحل فاشوش
يعني اللي سامع
ويرسم رتوش
مطرف المدينه
وناس حيرانين
قلوبهم حزينه
بحكم السنين
تغيب السكينه
عن المكسورين
وقلب السفينه
مسافر حزين

مكسور

مغصوب على حلم السفر
ولا الرحيل كيفك
يا حلم مرسوم ع الحجر
لساك أسير زيفك
إنت اللي باين ف الصور
ولا الخيال طيفك
لساك بتحلم بالقمر
ولا إنكسر سيفك
يا ظهر متزوق وجع
ياما الحمول قالت
أول حمولك صوت ودع
والتاتي والتالت

والحمل ولا مره بيقع
مهما السنين طالت
والقلب مسنود ياجدع
على روحه وإن مالت
يا نهار متغمي وميت ساقيه
حواليه بتدور
متعشم ف النسمة الباقيه
وبواقي النور
والغيمه بتخطف أحلامه
وتأخذها بعيد
ومازال بيعاتب أيامه
ومازال مكسور

الصبر ...

وطن الغلابه الصبر
ع البخت مستعفي
لابد لحد القبر
ع الوعد بيوفي
يجبر جروحك جبر
ويزيد وبيكفي
ويعدي بيك العمر
بالصبر متدفي
علمت قلبي الصبر
وقت الضيق
يفرد شراع الفجر
لما تضيق

قولته ضحك البحر
مش مضمون
يضحك ساعات وتبات
ف حضنه غريق

السبع

والسبع يملك عرينه
ويموت وضهره مفروود
توب المهابه يزينه
مرهوب ما بين الأسود
لا غدر صاحب يهينه
ولا ليل تعالب يسود
ولا يحني بالخوف جبينه
ولا يغوى رقص القروود

يا دنيا ...

يا دنيا غاويه تجرحنا
بتفرش كل يوم محنه
تدوس فوق الوجع روحنا
ويكسي الخوف ملامحنا
نقابل بعض ف الطرقات
ونتبسم كما الأعراب
حنين ساكن قلوب أموات
بنكبر والوجع متساب
بنضحك والعيون قاسيين
وحتي ضحكنا كداب
ونفرح بس مش حاسين
كأن الجرح عمره ما غاب

غريب إن الوجد فينا
بيكسرنا يقسينا
بدل ما الحب يهدينا
نقع وتتوه خطاونا
بنتنفس كما العائشين
ونتكلم وفينا الصوت
وبنغني وصوتنا حزين
بيشبهه لحنه غنوة موت
معدناش موعودين بالحلم
ولا ساكن قلوبنا وريد
نفوس إتكسرت م الظلم
قلوب إتبدلت بحديد

السيرة الذاتية

الاسم / شريف أنيس

تاريخ الميلاد / ١١-٢-١٩٧٩

ابو تيج غرب السكة الحديد بجوار ورشة البلاط

محافظة أسيوط

الوظيفة / أخصائي اجتماعي أول بالتربية والتعليم

عضو نادي أدب ابو تيج

أهم الجوائز:

المركز الاول في مسابقة اقليم وسط الصعيد

الثقافي للشعر العامي ٢٠٢١

الاعمال المنشورة:

قصيدة الجد ضمن كتاب مبدعون من المنيا وأسيوط

الصادر عن مؤسسة ساقية القاضي الثقافيه

الفهرس

المحتويات

٣	الإهداء
٤	كل عينيك بالصبر
٧	خيال... ..
١٠	عمار
١٢	كل القصص
١٥	سنه ورا سنه
١٧	أمي
١٨	أربعين... ..
٢٠	يارب
٢٢	عزيزي
٢٨	آخر السنه
٣٢	مضطر
٣٥	رد الجميل
٣٧	إندهاشك !

قلبي الخجول

- وجايز ٣٩
- العالم له قوانينه ٤٠
- قلبي الخجول ٤٤
- مثل ٤٦
- مولود ف الشارع ٤٨
- كان نفسي ٥٠
- الليل غريب ٥٢
- بين المداين ٥٤
- خلي سرك .. جوه بير ٥٦
- قلب صغير ٦٠
- الحلم درویش ٦٢
- كان ٦٥
- فات من عمرى سنه ٦٧
- نكبر ٦٩
- صلاح ٧٠
- ورده ٧٣
- شجن ٧٥
- حكواتي ٧٧

قلبي الخجول

- ٧٩ تغور السياسة
- ٨٣ نور
- ٨٤ إنتي
- ٨٥ وتقريبا
- ٨٧ مطر
- ٨٩ مكسور
- ٩١ الصبر
- ٩٣ السبع
- ٩٤ يا دنيا
- ٩٦ الفهرس

دار
البديع العربي
للطباعة والنشر
ت/ 01061635162



المقطع... بين المداين
بين المداين شوفت ألف مدينه
بتلف توب الفرع ع الصفين
إلا مدينة قلبي لسه حزينه
مكتوب تبات و الدمع ملو العين
على بابها صورة حلم مش مسموح
وبين شوارعها الوشوش بتغيب
يحكي الوريد عن شمسها ويروح
وإزاي بترحل سايبه ألف حبيب
نفس المدينه باختلاف العمر
بس المدن زي البشر بنزول
أوقات بيسكن بين دروبها فجر
وساعات بتبكي بس مش بتقول



01061635162